

**საქართველოს კანონი**  
**საქართველოს სისხლის სამართლის კოდექსში ცვლილების შეტანის**  
**შესახებ**

**მუხლი 1.** საქართველოს სისხლის სამართლის კოდექსში (საქართველოს საკანონმდებლო მაცნე, №41(48), 1999 წელი, მუხ. 209) შეტანილ იქნეს შემდეგი ცვლილება:

**1. 259-ე მუხლი ჩამოყალიბდეს შემდეგი რედაქციით:**

**„მუხლი 259. ცხოველის წამება, მისდამი სასტიკი მოპყრობა ან სხვაგვარი ძალადობა**

1. შინაური ბინადარი ცხოველისათვის ვეტერინარული ოპერაციის ჩატარება არასამკურნალო მიზნით ან ფუნქციური დანიშნულების გარეშე, რამაც მისი სხეულის მძიმე დაზიანება ან დაღუპვა გამოიწვია,-

ისჯება ჯარიმით, საზოგადოებისათვის სასარგებლო შრომით ვადით სამოციდან ასოც საათამდე ან შინაპატიმრობით ვადით ექვს თვემდე.

**2. ამ მუხლის პირველი ნაწილით გათვალისწინებული ქმედება, ჩადენილი:**

- ა) ჯგუფურად;
- ბ) არაერთგზის;
- გ) არასრულწლოვანის თანდასწრებით;
- დ) ორი ან ორზე მეტი ცხოველის მიმართ, –

ისჯება ჯარიმით, შინაპატიმრობით ვადით ერთ წლამდე ან თავისუფლების აღკვეთით ვადით ექვს თვემდე.

3. შინაური ბინადარი ცხოველის გამოყენება სხვადასხვა სამეცნიერო ექსპერიმენტისთვის და ლაბორატორიული ცდების ჩატარება, გარდა „ჯანმრთელობის დაცვის შესახებ“ საქართველოს კანონმდებლობით გათვალისწინებული შემთხვევებისა,-

ისჯება ჯარიმით, საზოგადოებისათვის სასარგებლო შრომით ვადით ას ოციდან ორას ორმოც საათამდე, შინაპატიმრობით ვადით ექვს თვემდე ან თავისუფლების აღკვეთით ვადით ექვს თვემდე.

**4. ამ მუხლის მე-3 ნაწილით გათვალისწინებული ქმედება, ჩადენილი:**

- ა) ჯგუფურად;
- ბ) არაერთგზის;
- გ) არასრულწლოვანის თანდასწრებით;
- დ) ორი ან ორზე მეტი ცხოველის მიმართ, –

ისჯება ჯარიმით, შინაპატიმრობით ვადით ექვსი თვიდან ერთ წლამდე ან თავისუფლების აღკვეთით ვადით ექვსი თვიდან ერთ წლამდე.

5. შინაური ბინადარი ცხოველის საკვებად გამოყენება ან/და მისგან პრეპარატებისა და ქიმიური საშუალებების დამზადება,-

ისჯება ჯარიმით, საზოგადოებისათვის სასარგებლო შრომით ვადით ორას ორმოციდან სამას სამოც საათამდე, შინაპატიმრობით ვადით ექვსი თვიდან ერთ წლამდე ან თავისუფლების აღკვეთით ვადით ექვსი თვიდან ერთ წლამდე.

6. ამ მუხლის მე-5 ნაწილით გათვალისწინებული ქმედება, ჩადენილი:

- ა) ჯგუფურად;
- ბ) არაერთგზის;
- გ) არასრულწლოვანის თანდასწრებით;
- დ) ორი ან ორზე მეტი ცხოველის მიმართ, –

ისჯება ჯარიმით, შინაპატიმრობით ვადით ექვსი თვიდან ერთ წლამდე ან თავისუფლების აღკვეთით ვადით ერთიდან ორ წლამდე.

7. ცხოველთა ორთაბრძოლების ორგანიზება, ჩატარება, პროპაგანდა,-

ისჯება ჯარიმით, შინაპატიმრობით ვადით ექვსი თვიდან ერთ წლამდე ან თავისუფლების აღკვეთით ვადით ერთი წლიდან თვრამეტ თვემდე.

8. ამ მუხლის მე-7 ნაწილით გათვალისწინებული ქმედება, ჩადენილი:

- ა) ჯგუფურად;
- ბ) საჯაროდ;
- გ) არაერთგზის;
- დ) არასრულწლოვანის თანდასწრებით;
- ე) ორი ან ორზე მეტი ცხოველის მიმართ, –

ისჯება ჯარიმით, შინაპატიმრობით ვადით ერთი წლიდან თვრამეტ თვემდე ან თავისუფლების აღკვეთით ერთიდან ორ წლამდე.

9. შინაური ბინადარი ცხოველის მოვლა-პატრონობისა და საქართველოს კანონმდებლობით დადგენილი უსაფრთხოების მოთხოვნების დარღვევა, რასაც შედეგად მოჰყვა ადამიანის ჯანმრთელობის ნაკლებად მძიმე ან მძიმე დაზიანება, -

ისჯება ჯარიმით, შინაპატიმრობით ვადით ერთი წლიდან თვრამეტ თვემდე ან თავისუფლების აღკვეთით ვადით თვრამეტი თვიდან ორ წლამდე.

10. ამ მუხლის მე-9 ნაწილით გათვალისწინებული, ჩადენილი:

- ა) ჯგუფურად;
- ბ) საჯაროდ;
- გ) არაერთგზის;
- დ) არასრულწლოვანის თანდასწრებით;
- ე) ორი ან ორზე მეტი ცხოველის მიმართ, –

ისჯება ჯარიმით, შინაპატიმრობით ვადით თვრამეტი თვიდან ორ წლამდე ან თავისუფლების აღკვეთით ვადით თვრამეტი თვიდან ორ წლამდე.

11. ცხოველის წამება, მისდამი სასტიკი მოპყრობა ან სხვაგვარი ძალადობა, რამაც მისი დასახიჩრება გამოიწვია, –

ისჯება ჯარიმით, შინაპატიმრობით ვადით თვრამეტი თვიდან ორ წლამდე ან თავისუფლების აღკვეთით ვადით თვრამეტი თვიდან ორ წლამდე.

12. ამ მუხლის მე-11 ნაწილით, ჩადენილი:

- ა) ჯგუფურად;
- ბ) საჯაროდ;
- გ) არაერთგზის;
- დ) არასრულწლოვანის თანდასწრებით;
- ე) ორი ან ორზე მეტი ცხოველის მიმართ, –

ისჯება ჯარიმით, შინაპატიმრობით ვადით ორიდან სამ წლამდე ან თავისუფლების აღკვეთით ვადით ორიდან სამ წლამდე.

13. ცხოველის წამება, მისდამი სასტიკი მოპყრობა ან სხვაგვარი ძალადობა, რამაც მისი დაღუპვა გამოიწვია, –

ისჯება ჯარიმით, შინაპატიმრობით ვადით ორიდან სამ წლამდე ან თავისუფლების აღკვეთით ვადით ორიდან ოთხ წლამდე.

14. ამ მუხლის მე-13 ნაწილით გათვალისწინებული ქმედება, ჩადენილი:

- ა) ჯგუფურად;
- ბ) საჯაროდ;
- გ) არაერთგზის;
- დ) არასრულწლოვანის თანდასწრებით;
- ე) ორი ან ორზე მეტი ცხოველის მიმართ, –

ისჯება ჯარიმით, შინაპატიმრობით ვადით სამიდან ოთხ წლამდე ან თავისუფლების აღკვეთით ვადით სამიდან ხუთ წლამდე.”.

**მუხლი 2.** ეს კანონი ამოქმედდეს 2024 წლის პირველი ივლისიდან.